

岐山縣志

一
函
四
冊
函

岐山縣志序

自黃圖決錄諸書出秦中地志遂濫觴焉
其著者如宋敏求長安志臚炙藝林至明
季喬呂康韓王張諸賢輩出規昉馬班折
衷道義各有撰述以成一家之言傳為故
實然皆秦人志秦雖其言信而有徵而求
長吏之紀載綦少

國朝乾隆間弇山畢大中丞撫秦值時清宴

留意文藻檄諸郡邑修輯志乘一時人文
薈萃守令多淹雅之才敷文奏懷各侈隆
富有未逮者又得洪稚存孫季述兩君子
相與纂輯編摩關中地志駸駸不懈而企
於古噫歟盛哉迄今將屆百年矣兵燹頻
經風會更變其間文學德行固不乏人而
忠孝節義為國殞身者亦正多湮沒急有
待於表章地方長吏其忍聽其泯泯哉余

自甲申夏觀政鳳邠恆以風教為念每同
官來謁必索觀志乘以考方隅掌故稽政
治得失者縣州郡凡十有三屬大半舊志
失修多歷年所今八月岐山令胡君鴻賓
以所輯邑乘來問序於余閱之綱舉目張
有條不紊源源本本考核精詳於軍興後
死事男女尤三致意竊不禁欣然喜慨然
歎焉夫風俗與世運移易長吏之賢否民

俗之厚薄因之鴻賓本吾蜀青城之秀弱
冠以教職從戎積勞敘補斯邑下車伊始
卽值奇荒頻年賑濟積儲凡所以為岐民
者心力交瘁處煩劇之地承凋敝之餘而
能以補墜拾遺顯微闡幽為已任其平日
之勤教養端風化概可知矣他日循良報
最 丹宸書名由牧令而游陟大僚政事
文章當更卓卓有可紀者豈徒以斯志見

哉況岐為成周發祥之地民儉樸士純良
鴻賓以政教先之繼此宰邑者顧念前徽
勵精圖治又將蒸蒸日上媲美古甘棠召伯
之盛不難踵而志者且與經史後先輝映
又奚止黃圖決錄並傳不朽哉余將日夕
望之

光緒十一年歲次乙酉孟冬月中澣吉旦

賜同

進士出身

誥授朝議大夫前翰林院檢討都察院工科掌
印給事中現任陝西鳳邠鹽法道蜀東少
岷氏吳鎮謹序



岐山新志序

余觀夫詩書之所載傳記之所錄凡賢士大夫之有造於民者必先舉其山川之險易土田之肥磽物產之盈虛戶口之增減一一熟悉其所以然而後舉而措之有餘裕焉未有曹然於此數端而得厠名循吏之傳者也光緒癸未年奉

命出守鳳翔一時同舟諸君子類皆能留心民

瘼實事求是岐令

胡君鴻賓少長於相

如子雲之鄉沐浴先達之遺風其於詩書
傳記之所稱固已飫聞而博覽之矣洎同
治之初從戎關隴轉運岐郿間時雖軍書
旁午而君所涉歷之處凡山川土田之
廣輪物產戶口之消息無不默識之於心
以爲他日有用之學旣而軍事解嚴後
君題補岐邑令於是卽其向之所默識者

證之以耆老之所陳徵之以文獻之所紀
興廢舉墜因時制宜越數載民氣以和頌
聲大作乃從事於志乘之書取前令郭君
之舊編芟蕪繁蕪補苴罅漏凡自乾隆至
今百有餘年賢士大夫之所設施與君
之所爲興利而除弊者皆粲然以具焉旣
脫稿則以書來言曰岐志之不修也久矣
軍興以來忠義士民節烈婦女尤不可以

無傳爰採訪蒐集以成是編自愧無文惟
紀實也余嘉 君之志在於闡揚忠烈激
厲風俗而非徒矜纂組之華逞丹鉛之辨
也亟取而讀之其敘次也簡而明其評論
也公而恕有一事之長輒津津道之不去
口其偶涉於不韙者則畧之而不具書固
存厚之道歟抑邑志之與國史其體例固
不能盡同也若夫附天文於地理之篇錄

藝文於各卷之後一懼其泛而難徵一欲
其彙而易核善哉其於阮亭之所云文簡
事覈訓詞爾雅者蓋庶幾矣余向者知

君之有良吏才而不知君之有良史才

也然則世之有事於民社者非熟悉其山
川之險易土田之肥磽物產之盈虛戶口
之增減固不足以爲良吏亦非熟悉其山
川之險易土田之肥磽物產之盈虛戶口

之增減並不足以爲良史也余嘉 胡君
之有造於岐之民而卽有以匡余之不逮
也爰濡筆而爲之序

皆

光緒歲次旃蒙作噩壯月上澣知鳳翔府
事愚弟蘇完熙年夢錫甫拜撰



重修岐山縣志敘

岐處鳳郡西爲周室發祥地卷阿周原甘棠鳴鳳諸勝雜見經史秦漢以降世代迭更疆域沿革亦各不同讀書稽古之士渡雍渭而訪召亭睹山川人物餘韻流風慨然想見古人盛治感嘆興懷然則岐不甚賴有志哉光緒四年春余承乏是邦甫下車哀鴻滿地嗷嗷待哺目擊心傷思爲賑

撫計而山原川隰墟落茫然急索志閱之
辨方別里次第授食岐人得賴以安自後
凡民生所繫政治所關恒取資於志按岐
志創自前明韓君廷芳于君邦棟續之其
書弗傳

國朝順治初王君穀乾隆間郭君履恒相續成
書蒐羅博雅義例詳明予小子復何議焉
雖然志者史之遺也國不能一日無史邑

不能一事弗志乾隆距今百餘年矣其間
兵旱頻仍滄桑迭變敷文奏雅紆紫拖青
爲里閭光者固多而義夫烈婦捐軀殺賊
抗節磨笄毅魄貞魂光爭日月者正復不
少此雖

朝廷厚澤深仁培養所至而扶翼綱常廉頑立
懦謂非風俗之裨益歟余忝爲長吏聽其
泯沒咎烏能辭今幸關隴肅清歲豐民悅

拾遺補闕舍此更復何時爰與邦人士分
門別類博採周諮復延屯田張君震溪編
次甲乙公退之餘相與商訂閱六月而成
書無濫無隱可信可徵凡嘉道以來人才
消長民數盈虛政治得失與夫風俗移易
時運盛衰皆得與古昔並傳閱是編者亦
足資勸懲而昭法戒又豈徒攬山川懷往
聖歌咏風景已哉若遷董之良班范之法